



Tuut...

- Sì, pront.

- Pieri?

- Sì, o soi jo.

- Bundì, jo o ai non Marie

- Marie? Marie cui?

- I ano robade la machine a lui?

- Eh? La machine? Sì, magariussinò... ma jê cemût fasie a savê? Ise de pulizie? Ce maniere saie jê? O ai a pene fate la denuncje!

- Le ai cjolte jo.

- Ce robe? Ce..

- Sì, la machine, le ai cjolte jo, la sô machine.

- Ma... cemût... ma jê cui ise?

- O soi Marie, jal ai bielzà dit!

- Le aie cjapade sù, cence savê? Ce maniere... Lis clâfs... sì, lis vevio lassadis sù, cence savê, par câs?

- Noo, le ai robade. O soi une lare jo.

- Ma, ma, ma! Ce maniere? Ma jo o clami la pulizie. Ma jo...

- Nol si vergogne lui?
- Ce? Jo, ma...
- Sì, lui nol si vergogne?
- Jo aio di vergognâmi? Jo?
- Sì lui! Lui al à di vergognâsi!
- Di dulà clamie jê?
- Po no saio! Cumò o ven a dîi a lui di dulà ch'o clami!
- Ma mi telefone a cjase, a mi, ma cui ise jê?
- Marie! E trê voltis che jal dîs! Isal dût di comprendoni o ben...
- Marie e vonde? Marie cemût? A son tantis Marie!
- Juste in pont par chel, po!
- Ma cemût si permetie, ma cui ise, ma ce vuelie, ma cuant...
- Ch'al si vergogni! Lassâ ator une machine in chei stâts... cul stierç rot, che ancjemò un pôc o lavi a finîle cuintri un arbul, e se mi fasevi mâl?
- Ma jê cui ise?
- Marie. E cuatri voltis!
- Ma...robis di mats E ce vuelie vê?
- Che al rispuindi: nol si vergogne?
- Ma ce vergogne! Jo? Jê che si vergogni! Une lare! No si vergogne a fâ la lare? A robâ machinis?!
- Va ben. Se propi i fâs plasê, mi vergogni ancje jo.
- Ah sì? Alore bisugne che ...
- Bisugne che o gambii...
- Ah, eco, brave! Deventâ oneste, gambiâ...
- Mi metarai a... robâ barcjis.
- Ma alore! Ce disie? Oneste al vûl dî... Jo le ai paiade cu lis mês faturis, la mê machine...
- Nol à di vê fat grandis faturis, alore!
- Ce robe?
- Un fanalin crevât, frizion che e grate su la tierce, e dal sigûr e consume une vore! Che al si vergogni!

- Che e si vergogni jê! Pront? Pront? Siore, ise lì? Marie? E à tacât! Ma viot ce robis che a àn di tocjâmi!... Ma jo o clami la pulizie!

- Pieri?

- Ah! E je ancjemò lì.

- Che nol stei a fastiliâ, la fature dal mechanic le fâs consegnâ drete a cjase sô!

di Laurin Zuan Nardin

#1053